

ՊԱՇՏՈՆԱԿԱՆ ԸՆԴԴԻՄԱԽՈՍԻ ԿԱՐԾԻՔ

Հայկ Արթուրի Դեերյանի «Երևանի ստորգետնյա տարածքների զարգացման և օգտագործման ճարտարապետական առանձնահատկությունները» վերնագրով թեկնածուական ատենախոսության վերաբերյալ, ներկայացված՝ ԺՀ.00.01 - «Ճարտարապետություն» մասնագիտությամբ ճարտարապետության թեկնածուի գիտական աստիճանի հայցման համար:

Ժամանակակից աշխարհում ուրբան միջավայրի խիտ բնակեցմամբ ու կառուցապատմամբ, ինչպես նաև ստորգետնյա և վերգետնյա տարածքների ներդաշնակ և համակարգված շահագործման խնդիրներով պայմանավորված՝ ակտիվացել է ստորգետնյա տարածքների օգտագործման նկատմամբ հետաքրքրությունը: Մետրոյի, պահեստավորման, կոմունալ համակարգերի և ապաստարանների համար օգտագործվող ստորգետնյա տարածքները ժամանակակից քաղաքներում վերածվում են բազմագործառույթային միջավայրերի՝ ծառայելով հասարակական, առևտրային և մշակութային նպատակների:

Երևան քաղաքը, նույնպես, այս տեսակետից կանգնած է լուրջ մարտահրավերների առջև, քանզի գերբնակեցումը, տրանսպորտային գերժանրաբեռնվածությունը, հողի սահմանափակ հասանելիությունը լուրջ խնդիրներ են հարուցում և պահանջում են կայուն զարգացման անհրաժեշտություն: Հենց սրանով է պայմանավորված ատենախոսության թեմայի արդիականությունը:

Հետազոտությունը նպատակ է հետապնդում ընդհանրացնել Երևան քաղաքի ստորգետնյա տարածքների օգտագործման արդի խնդիրները և դրանց հետագա զարգացման համար մշակել համակարգային մոտեցումներ:

Ատենախոսությունը բաղկացած է 124 էջ տեքստային մասից և 33 էջ հավելվածից: Տեքստային մասը ներառում է ներածություն, երեք գլուխներ, եզրակացություն և 103 անուն օգտագործված գրականության ցանկ:

Ներածությունում ատենախոսը հիմնավորվել է հետազոտության արդիականությունը, ներկայացվել են հետազոտության նպատակը, խնդիրները և տրվել է աշխատանքի մեթոդաբանությունը:

Ատենախոսության առաջին «Ստորգետնյա տարածքների օգտագործման միջազգային փորձի ուսումնասիրություն» վերնագրված գլխում քննարկվել են ստորգետնյա տարածքների օգտագործման դրդապատճառները, կատարվել է պատմական զարգացման, ինչպես ատենախոսն է ասում համառոտ, բայց մեր կարծիքով բավական ընդարձակ քննություն: Ներկայացվել է տարբեր ժամանակաշրջանների և վայրերի ստորգետնյա

տարածքների առաջացման և զարգացման գործընթացը: Դիտարկվել են ստորգետնյա տարածքների օգտագործման հայտնի վաղագույն ստորգետնյա քաղաքներից մինչև 20-րդ դարը ներառյալ օրինակները: Դուրս են բերվել բոլոր այն գործոնները (քաղաքաշինական ճանապարհատրանսպորտային, գործառույթային, սոցիալական, էկոլոգիական, տնտեսական, իրավական), որոնք նպաստում են ստորգետնյա տարածքների օգտագործումն արդյունավետ դարձնելուն: Կատարվել է ստորգետնյա տարածքների դասակարգում ըստ իրենց ծավալատարածական բնութագրերի:

Ամփոփելով առաջին գլուխը՝ ստորգետնյա տարածքների օգտագործման միջազգային փորձի համալիր ուսումնասիրության արդյունքում, Հայկ Դեերյանը գտնում է, որ ստորգետնյա տարածքները քաղաքային միջավայրի կարևորագույն բաղկացուցիչ տարրերից են և տալիս են քաղաքի խիտ կառուցապատված վայրերում նոր անհրաժեշտ մակերեսների և գործառնական գոտիների կերտման հնարավորություն՝ լուծելով բարձր ուրբանիզացման մակարդակ ունեցող քաղաքների ձևափոխման խնդիրները: Առանձնացվել են նաև ստորգետնյա տարածքների նախագծման, օգտագործման և հեռանկարային զարգացման գործընթացների վրա ազդող հատկանիշները:

Ատենախոսության երկրորդ գլուխն ամբողջությամբ անդրադարձ է Երևանի կենտրոնի ստորգետնյա տարածքների (գետնանցումներ, մետրո, առևտրահասարակական տարածքներ) ներկայացմանը: Կատարվել է վերջիններիս վերլուծություն ըստ գործառույթային առանձնահատկությունների, հասանելիության և քաղաքային միջավայրում ունեցած տեղադիրքի:

Ներկայացվել է Երևանի մետրոյի զարգացման պատմական հատվածը, որից հետո կատարվել է կայարանների և մուտքային հանգույցների հայեցակարգային վերլուծություն: Ուսումնասիրվել են առևտրահասարակական ստորգետնյա տարածքները՝ ելնելով քաղաքային միջավայրում գործառույթային ներգրավման առանձնահատկություններից: Քննարկվել են ծավալահատակագծային լուծումները և դրանց չափորոշիչները:

Առանձին քննարկման առարկա են դարձել Երևանի կենտրոնի ինչպես նախկինում արված գոտիավորման առաջարկներն ու առ այսօր իրականացված, այնպես էլ չիրականացված նախագծերը: Ուսումնասիրվել են 2007 թվականին մշակված Երևան քաղաքի «Կենտրոն» թաղային համայնքի տարածքի գոտիավորման նախագծում առկա ստորգետնյա քաղաքաշինության զարգացման առաջարկները, ինչպես նաև վերլուծվել են Մայաթ-Նովա և Գլխավոր պողոտաների, Ֆրանսիայի և Հանրապետության հրապարակների, Հանրապետության հրապարակից մինչև Մոսկվայի հրապարակ ընկած հատվածի հայեցակարգային առաջարկները:

Արդյունքում դուրս են բերվել Երևանի կենտրոնում գոյություն ունեցող ստորգետնյա

տարածքների օգտագործման առկա խնդիրները (մեկուսացվածություն, փոխկապակցվածության բացակայություն, ուղղահայաց կապի խզում, գործառույթների անհամատեղելիություն, հոսքերի տարանջատման բացակայություն): Ատենախոսն իրավացիորեն գտնում է, որ խնդիրների առաջացումը և լուծումների ոչ հստակ լինելը ընդհանուր մոտեցումների և հստակ չափորոշիչների համակարգվածության բացակայության արդյունք է:

Հաջորդ՝ երրորդ գլխում ունենալով դուրս բերված խնդիրները Հայկ Դեերյանը փորձում է դրանց համար լուծումներ առաջարկել: Առաջին հերթին ատենախոսը գտնում է, որ Երևանի կենտրոնի ստորգետնյա տարածքների համալիր օգտագործման գոտիավորման սխեմա պետք է նախատեսվի, որի շնորհիվ կստեղծվի անընդհատ հետիոտնային փոխկապակցվածություն քաղաքաշինական դոմինանտների, մշակութային և վարչական գոտիների, Երևան քաղաքի գլխավոր կանաչապատ զանգվածների միջև:

Մշակվել է Աշխարհագրական տեղեկատվական համակարգի (ԱՏՀ) գործիքակազմի վրա հիմնված մեթոդ, որի շնորհիվ կարելի է իրականացնել քաղաքաշինական եռաչափ ուսումնասիրություններ՝ բացահայտելով Երևան քաղաքում նախատեսվող ստորգետնյա տարածքների իրատեսական ծավալատարածական չափորոշիչները: Կիրառվել է “PESTEL” մեթոդը՝ որպես ստորգետնյա տարածքների զարգացման տնտեսական պայմանների գնահատման միջոց, իսկ տեսական մեթոդի գործառնական կիրառության սխեմատիկ օրինակ է վերցվել Երևանի Աբովյան և Կորյուն փողոցների խաչմերուկում գտնվող գետնանցումից մինչև Աբովյան և Իսահակյան փողոցների խաչմերուկում գտնվող ստորգետնյա «Մետրոնոմ» առևտրի և ժամանցի կենտրոն ընկած հատվածը, ինչպես նաև «Մետրոնոմ»-ից մինչև Իսահակյան և Տեղյան փողոցների խաչմերուկում նախատեսվող գետնանցումը:

Առաջարկվել են մի շարք քաղաքաշինական և տարածական պլանավորման միջոցառումներ, մոտեցումներ և դասակարգումներ, որոնք անհրաժեշտ է ներդնել՝ ստորգետնյա տարածքների օգտագործումը համակարգելու, վերահսկելու, զարգացնելու, օբյեկտիվորեն գնահատելու, որոշումներ կայացնելու և հետագա փոփոխություններին պատրաստ լինելու համատեքստում:

Պետք է նշել, որ առաջարկված մեթոդներն ու գործիքակազմը ունեն կիրառական նշանակություն և ատենախոսի կողմից առաջարկված՝ ստորգետնյա տարածքների համակարգված օգտագործման շնորհիվ կլուծվեն են մի շարք քաղաքաշինական խնդիրներ և կպահպանվի Երևանի կենտրոնի պատմամշակութային կերպարը:

Բարձր գնահատելով Հայկ Դեերյանի ատենախոսությունն ու կատարած աշխատանքը, կուզենայինք ներկայացնել որոշ նկատառումներ:

Ներածության մեջ գրականության տեսությունը միայն թվարկման կարգով է ներկայացված:

Անհրաժեշտություն կար ունենալ մեկնաբանություններ:

Ցանկալի կլիներ առաջին գլխի պատմական ակնարկը համառոտ տեսնել և ավելի շատ ներկայացվեին ստորգետնյա տարածքների օգտագործման հայկական օրինակները (Ժայռափոր Անին): Այստեղ տարանջատում պետք է լիներ Ժայռափոր համալիրների և ստորգետնյա կառուցվածքների միջև:

Աշխատանքում առկա հիմնական դրույթներին նախկինում էլ անդրադարձ եղել է, կարելի էր ավելի հստակ ձևակերպվեր այն նորույթը, որ բերում է ներկայացված ատենախոսությունը:

Քանի որ ատենախոսն ընտրել է համալիր քննության մեթոդաբանությունը կարելի էր նաև առաջադրված խնդիրներին ավելի արդյունավետ լուծումներ տալու համար, օգտագործել նաև հանրային քննարկումների և հարցումների եղանակը:

Մեր կարծիքով, քանի որ Երևանի կենտրոնի կարևորությունը որպես պատմական, մշակութային և հանրային հանգույց միանշանակ է, պետք էր ստորգետնյա տարածքների վերաօգտագործմանը միտված առաջարկները նպաստեին նաև Ժառանգության հասանելիությանն ու զբոսաշրջային բիզնեսում ներգրավվածությանը:

Ասվածն, իհարկե, չի նսեմացնում ատենախոսության գիտական արժեքը: Ներկայացված թեկնածուական ատենախոսությունը ընդգրկուն և ավարտուն ուսումնասիրություն է, համապատասխանում է նմանատիպ աշխատանքներին ներկայացվող պահանջներին, իսկ Հայկ Արթուրի Դեերյանն արժանի է իր հայցած՝ ճարտարապետության թեկնածուի գիտական աստիճանի շնորհմանը:

Պաշտոնական ընդդիմախոս,

ՃՇՀԱՀ-ի ՃՏՊԺ ամբիոնի պրոֆեսոր,

ճարտարապետության դոկտոր՝



Լ. Վ. Կիրակոսյան

Լ. Վ. Կիրակոսյանի ստորագրության իսկությունը հաստատում եմ.

ՃՇՀԱՀ-ի գիտական քարտուղար՝

տ.գ.թ., դոցենտ



Լ. Հ. Լևոնյան

14.07.2025թ.